

MOCIÓN SOBRE A REDACCION DUN PLAN DE ACTUACIÓNS PARA A MELLORA DE ACCESIBILIDADE, SERVIZOS E CALIDADE AMBIENTAL NOS BARRIOS DE GUADALUPE, VITE E O ROMAÑO

O Grupo Municipal do Partido Popular, ao abeiro do Regulamento Orgánico Municipal, presenta, para a súa inclusión no Pleno, a seguinte MOCIÓN:

EXPOSICIÓN DE MOTIVOS

A maior parte dos barrios de Guadalupe, Vite e O Romaño veñen padecendo desde hai anos un progresivo deterioro que na actualidade está a acadar as súas máis altas cotas, tal e como teñen denunciado representantes das asociacións veciñais e tal e como temos advertido os grupos políticos presentando varias iniciativas a este respecto.


A situación adquire unha especial relevancia polo contraste que ofrecen moitas destas zonas en relación a outras moi próximas, onde desde hai anos se veñen desenvolvendo traballos para a modernización de infraestruturas, con renovación de equipamentos e servizos. Tal é o caso da Avenida de Castelao ou Vista Alegre que foron obxecto dunha profunda transformación, en boa parte froito dun convenio de colaboración coa Xunta de Galicia que permitiu a mellora dos seus pavimentos e beirarrúas, a eliminación de barreiras arquitectónicas, a dotación de mobiliario e obras de humanización.

Dun xeito gráfico –e con carácter xeral- pódese afirmar que hoxe a Avenida de Castelao e as rúas do polígono de Vista Alegre marcan os límites cara ao norte da renovación urbana, no que respecta á mellora de rúas, de beirarrúas e de servizos básicos, coas contadas excepcións dalgunhas urbanizacións de nova factura desenvolvidas recentemente.

É nese ámbito onde se debería continuar coas accións de renovación, afrontando as carencias e necesidades das que no anexo fotográfico adxunto ofrecemos apenas unha ducia de mostras dunha situación que, pola súa gravidade e extensión, debería ser afrontada de forma progresiva, pero sen dilación.

Ese foi o motivo polo que o Grupo Popular no principio desde mandato –e posteriormente nunha segunda ocasión- solicitaba acometer dous proxectos que quedaran licitados en maio de 2015: un para unha mellora integral da rúa Blanco Amor en Vite e outro para varias actuacións hidráulicas e viarias no Romaño.

Outros grupos da Corporación tamén presentaron iniciativas, facéndose eco das demandas veciñais, para que se actuase na iluminación, na limpeza, nas deficiencias no saneamento ou na mobilidade e accesibilidade de varias zonas neste ámbito, tal e como tamén denuncian con frecuencia os medios informativos, contando coa testemuña e o apoio dunha veciñanza preocupada e implicada na resolución destas carencias.



En todos os casos, a unanimidade para actuar no seo do Pleno municipal foi absoluta, pero a resposta do Goberno local sempre foi a mesma: a inacción e o esquecemento, mesmo cando os seus membros chegaban a expresar o compromiso de actuar ao longo do actual ano.


Chegados a este punto, cando o ano xa remata e a pouco máis de cinco meses do final do mandato, parece evidente que, aínda que o Goberno cambiara diametralmente a súa actitude, apenas se podería acometer algunha pequena actuación puntual de mantemento, sen tempo xa para afrontar a contratación e execución dunha serie de obras necesarias para adaptar a realidade destes barrios aos estándares de calidade das zonas colindantes e máis próximas ao centro da cidade.

Por este motivo, e coa finalidade de que o Goberno actual poida saír da súa atonía e aminorar a súa indolencia cos acordos adoptados e coas demandas da cidadanía propoñemos a adopción do seguinte

ACORDO:

O Pleno da Corporación insta ao correspondente órgano do Goberno a que coa maior urxencia proceda a redactar un plan director coa principais actuacións a desenvolver nos barrios de Vite, Guadalupe e O Romáño, tomando como base as iniciativas aprobadas para este ámbito no actual mandato, para que sirva de guía e referencia para os traballos que se poidan desenvolver polo novo Goberno municipal que saia das eleccións municipais a celebrar o vindeiro ano.

Santiago de Compostela, 10 de decembro de 2018



Agustín Hernández
Portavoz do Grupo Municipal Popular

- Sr. Alcalde do Concello de Santiago de Compostela

ANEXO FOTOGRÁFICO



